

Udang, ikan terkenca racun

Oleh Mohd Rafi Mamat
am@hmetro.com.my

04/05/23 M/S 19
Kuantan

Perbuatan tidak bertanggungjawab meracun dikesan berlaku di Sungai Belat, di sini kelmarin hingga menyebabkan banyak udang galah dan ikan mati.

Beberapa nelayan darat mendakwa sebelum ini kes sama berlaku pada awal Ramadan yang turut menyebabkan banyak hidupan sungai berkena terutama udang galah dan pelbagai spesies ikan mati.

Nelayan darat yang hanya mahu dikenali sebagai Zul, 36, berkata, udang galah yang berada dalam lukah nelayan hampir semua mati disebabkan dipercayai menerima aliran air sungai yang membawa bersama racun.

Menurutnya, sebelum ini ada nelayan melihat udang melompat di permukaan air mungkin disebabkan kesan racun yang terdapat dalam Sungai Belat yang bersambung dengan beberapa

sungai lain termasuk Sungai Kuantan dan Sungai Rasau.

“Udang galah yang mati dalam lukah nelayan bukan saja berbau busuk, tetapi juga bertukar warna menjadi kemerahan, udang yang mati secara semula jadi tidak bertukar warna dengan ke-tara.

“Kesan racun se-kurang-kurangnya selama seminggu bertahan dalam air sungai, dalam tempoh berkenaan aktiviti memancing tidak dapat dilakukan kerana udang tiada,” katanya, di sini semalam.

Katanya, faktor air pasang besar yang berlaku dapat mempercepatkan lagi air sungai yang akan membawa bersama racun digunakan pihak tidak bertanggungjawab.

Zul berkata, dia dan nelayan darat Sungai Belat yang lain termasuk kaki pancing kini menanggukkan aktiviti memancing berikutan kes meracun yang berlaku.

Nelayan darat yang mahu

dikenali sebagai Sulaiman, 53, berkata, aktiviti meracun mungkin dilakukan di sungai lain, namun kesan racun turut berlaku di Sungai Belat.

“Lebih tiga kilogram udang galah saya dalam lukah mati, semua terpaksa dibuang kerana bimbang kesan buruk berlaku pada pengguna,” katanya yang berharap pihak berkuasa memberi perhatian terhadap kes meracun di sungai.

Sementara itu, Pengarah Jabatan Perikanan Negeri Pahang, Abdullah Jafar berkata, pihaknya melarang penggunaan racun tuba, bahan letupan dan elektrik bagi menangkap udang dan ikan di sungai, lombong serta tasik.

“Mereka yang didapati bersalah boleh didakwa di bawah Kaedah-Kaedah Perikanan (Perairan Sungai) 1991 yang boleh dikompaun atau didakwa di mahkamah,” katanya.

“
Udang galah yang berada dalam lukah nelayan hampir semua mati
Zul



SEORANG nelayan darat menunjukkan udang galah yang mati dipercayai terkena racun di Sungai Belat.